

陸放翁全集

劍南詩稿

冊八



增補本草綱目

卷之三

七

劍南詩稿目錄

卷第三十一

山國師齋正首

久雨 偶得長魚巨蟹命酒小飲蓋久無此舉
也 泛舟湖山間有感 望永思陵二首 糟

蟹 霜夜三首 書室明煖終日婆娑其間倦
則扶杖至小園戲作長句二首 初冬 買屐

十月晦日作 贈道友五首 示子聿 老

境 予所居三山在鏡湖上近取舍東地一畝
種花數十株彊名小園因戲作長句 被命再
領沖佑有感 冬夜戲書三首 幽居二首

送蘇召叟秀才入蜀効宛陵先生體 寄題哲
上人漫堂 冬夜獨酌 夜坐燈滅戲作 艾

如張 上之回 雜詠園中菓子四首 閉戶二
首 連日大寒夜坐復苦飢戲作短歌 園中

對酒作 孝宗皇帝挽詞三首 小兒入城
夜坐二首 縱筆五首 郊行夜歸書觸目

閉戶

十一月五日夜半偶作

晴和出遊湖

山間

病思

寄子虞

紙閣午睡二首

夜

分復起讀書

効蜀人煎茶戲作長句

書逆

旅壁

嬾趣

閒中富貴二首

書近況寄蜀

中道舊

醉中自贈

明日自和

雪中至近

村

歲莫感懷以餘年諒無幾休日愴已迫爲

韻十首

桐江哲上人以端硯遺子聿纔寸餘

而質甚奇天將雨輒先流泚予爲效宛陵先生

體作詩一首

立春前三日作

贈應秀才

春耕

首春連陰

夜坐

新春

得季長書

追懷南鄭幕府慨然有作

正月十一日夜夢

與亡友譚德稱相遇於成都小東門外旣覺慨

然有作

送陳吏部還朝

觀棋

春行

兩

霽

春色粲然喜而有賦

幽思

贈持鉢道人

柳二首

山園雜詠五首

劍南詩稿卷第三十一

宋 陸 游 務觀

久雨

黃葉雨中盡飢鴻煙際來時艱歲仍惡身死病相催
西埭無行路南山有疾雷囊空罷沽酒一醉轉悠哉
偶得長魚巨蟹命酒小飲蓋久無此舉也

老生日日困驢齏異味櫻魚與楮鷄敢望槎頭分縮
項況當霜後得團臍堪憐妾出緣香餌尚想橫行向
艸泥東崦夜來梅已動一樽芳醞徑須攜

泛舟湖山間有感

我似人間不繫舟好風好月亦閑遊歸來華表千年
鶴滅沒煙波萬里鷗歲晚客貂那復歎時艱嫠緯未
忘憂野人只欲安耕釣江左夷吾可見不

望永思陵

綠衣迎拜屬車塵艸木曾霑雨露春二二十五年身未
死却爲天下最窮人

又

旰食憂民宴樂疎太倉幾有九年儲賈生未解人間
事北闕猶陳痛哭書紹興庚辰辛巳間游屢貢瞽言略蒙施用
糟蟹

舊交鬚簿久相忘公子相從獨味長醉死糟丘終不
悔看來端的是無腸

霜夜

梅花欲動夢魂狂橙子閑搓指爪香莫怪艸堂清到
骨一梳殘月伴新霜

又

黃甘磊落圍三寸赤蟹輪囷可一斤更喚東陽麴道
士與君霜夜策奇勳時東陽餉酒

澹月窺窗似有情更堪梅影向人橫放翁不受天魔

惱獨擁青氈睡到明

書室明煖終日婆娑其間倦則扶杖至小園戲

作長句

放翁老手竟超然俗子何由與作緣百榼舊曾誇席地一窗今復幻壺天夢回橙在屏風曲雨霽梅迎拄杖前吾愛吾廬得安臥笑人思穎憶平泉李衛公憶平泉山居歐陽公思穎詩皆數十篇

又

美睡宜人勝按摩江南十月氣猶和重簾不捲留香久古硯微凹聚墨多月上忽看梅影出風高時送鴈聲過一杯太淡君休笑牛背吾方扣角歌

初冬

老客人間百事慵樂哉閉戶過今冬朝爐獸炭騰紅焰夜榻蠻氈擁紫茸蝟刺坼蓬新栗熟鵝雛弄色凍酷濃題詩正自消閑日本不爭先萬戶封

買屐

一雨三日泥泥乾雨還作出門每有礙使我慘不樂
百錢買木屐日日繞村行東阡與北陌不間陰與晴
青鞋豈不佳要是欠耐久何當踏深雪就飲湖橋酒

十月晦日作

藤疎不覆架桐落欲平溝閨歲風霜晚衰年日月逍
觀書方坐石把釣又登舟不是無羈束閑人得自由

贈道友

凡骨已蛻身自輕勃落葉上行無聲華陰市樓醉舞
罷却上蓬峯看月明

又

憶在長安爛漫遊大明宮闕與雲浮今朝偶上慈恩
塔北望茫茫禾黍秋唐舍光殿與慈恩塔南北相直

又

當時辛苦學長生準擬中原看太平今日醉遊心已
足一瓢歸去隱青城

又

二盃兀兀復騰騰服氣燒丹總不能借問生涯在何
許孤舟風雨伴漁燈

又

零落殘碑艸棘中北邙蕭瑟又秋風舊時憶在鷄行
裏幾見言麻拜相公

示子聿

儒林早歲竊虛名白首何曾負短檠堪歎一衰今至
此夢回聞汝讀書聲

老境

平生百不遂惟有老如期眼澀觀書夜心衰把酒時
僧分新掘藥客誦舊題詩四十年前我回看定是誰
予所居三山在鏡湖上近取舍東地一畝種花
題記數十株彊名小園因戲作長句

出郭西南十里過小園風月得婆娑翠屏三扇恰相
倚玉鏡一奩誰爲磨投鑷未嫌衰鬢白插花聊喜醉
顏酡耶溪更盡青鞋興免使將軍怒脫靴

被命再領沖佑有感

珍倣宋版印

殘骸日益衰晨夜抱疾痛地爐得微火終日不憇動
讀書舊成癖今但坐作夢未能追鴻冥乃復分鶴俸
風霜舍邊柳合抱皆手種眼中人盡非欲話誰與共

冬夜戲書

東歸剡曲寄彷佯閑日雖冬亦自長梅瘦有情橫淡
月雲輕無力護清霜長魚通印鹽花白珍鮓披絲麪
糝香一飽喟然還自憫彊顏垂老食官倉

又

將挂衣冠彊小留期年畢竟是歸休青氈獨擁欺霜
夜濁酒頻傾洗客愁鶴影冷翻丹井月雁聲遙帶玉
關秋一生自笑閑中過不爲功名也白頭

又

老樹霜餘已盡紅縱橫落葉滿庭中一鉤澹澹西南
月萬鼓憑憑東北風賒酒每慚添舊券讀書何計策
新功蓬窗坐睡摧頰甚隔竹敲茶賴小童

幽居

落葉紛可掃幽花寒自開困空無雀噪門靜有僧來
孤學時方棄窮途勢莫回呼兒了租賦莫待縣符催
又

雨霽雞栖早風高雁陣斜園丁刈霜稻村女賣秋茶
缺井磨樵斧枯桑繫釣槎客來那用問此是放翁家
送蘇召叟秀才入蜀効宛陵先生體
士勇赴知己義重身固輕尊公況有命子得辭此行
結廬出門去迢迢過蠻荆泝江上風色入峽聽猿聲
萬里一紙書南寄孤雁征山陰在何處計子難爲情
願言早來歸鄰曲當出迎檮舟柯橋市一榼手自傾
寄題哲上人漫堂

老子從來任運行愛君堂以漫爲名北邙大有英雄
骨枉用工夫過一生

冬夜獨酌

寒水茫茫浸月明疎鐘杳杳帶霜清一樽濁酒有妙

理十里荒雞非惡聲物外雖增新跌宕胷中未洗舊
崢嶸頽然坐睡蒲團穩殘火昏燈伴五更

夜坐燈滅戲作

冷飯黃齧傲太平鬢絲原不爲愁生忽因燈死得奇
觀明月滿窗梅影橫

艾如張

錦膺繡羽名山雞清泉可飲林可栖稻梁滿野棄不
啄雖有奇禍無階梯東村西村煙雨晚蕭艾離離林
薄淺翩然一下駭機發汝雖知悔安能免漢家天子
南山下萬騎合圍窮日夜犬牙鷹爪死不辭觸機折
頸吁可悲

上之回

咸陽宮闕天下壯五更衛士傳雞唱重門洞開鑾駕
出回中更在雲霄上雲霄一路蟠青冥車聲隱鱗馳
雷霆宓妃穿仗玉母下何必軒皇居大庭君王遊幸
無終極萬年盡是歡娛日文成已死方不離茂陵松

柏秋蕭瑟

雜詠園中菓子

不酸金橘種初成無核枇杷接亦生珍產已從幽圃得濁醪仍就小槽傾

又

漿石榴隨鮑作節蠟櫻桃與酪同時兩株偶向池邊種可喜今年墜折枝

架垂馬乳收論斛港種雞頭采滿船龜鼎若爲占食指麴車未用墮饑涎

又

山杏谿桃本看花纍纍成實亦堪誇鹽收蜜漬饑風味送與山僧下夜茶

閉戶

聲利能令智者愚放翁閉戶養迂疎地爐枯葉夜煨芋竹筍寒泉晨灌蔬狗俗不如翻著韞愛山只合倒劍

騎驢今朝更有欣然處萬里知心一紙書蜀兵來得張
季長歸唐安江原書

又

冠蓋長安幾番新放翁只似向來貧滿窗紅日價無
敵半榼新醅香動人宴坐心光無蔽障橫眠睡息自
清匀世間不用詢名字身是無懷上古民

連日大寒夜坐復苦飢戲作短歌

翁飢不能具小飧兒凍何由成複禪藏書充棟讀至
老固願少出蘇黎元念當萬事度可否肯使一恨彌
乾坤古來賢達多晚謬千載遺笑綺與園老翁肝心
等鐵石他年骨朽此固存村沽雖薄亦取醉起看江
月傾金盆

園中對酒作

偃僂衰翁雪滿顛愛花耽酒似當年雖無錦障七十
里也有青銅三百錢數掩竹籬分小徑一泓沙井貯
寒泉栽紅接白株株活坐擁春工太半權

孝宗皇帝挽詞

大道本生知崇高志不移凝神超事物觀妙極希夷
訪藥三山遠遺弓萬國悲神孫昔鍾愛天作太平基

又

代邸膺圖日臨朝涕泗橫誠心非外飾至孝化羣生
高廟聯龍袞思陵接柏城平生奉親意一理貫幽明

又

便殿諮詢早深宮宴樂稀欲頒傳位詔猶索未明衣
壽損名方永身癯國愈肥孤臣泣陵柏心折九虞歸
小兒入城

小兒破帽出求師老子寒爐夜畫詩不耐青燈寫孤
影聊呼薄酒慰長飢我今僅守詩書業汝勿輕捐少
壯時但恨北風如許惡湖橋歸路想流澌

夜坐

萬蠻披書卷孤螢引篆香病思無事樂老悔少年狂
南渡衣冠盛西征道路長如今俱夢破高枕看人忙

又

葉盡木無聲天高夜自明映窗燈半滅掠野雁孤征
瓦裂人間事雲浮身後名惟應托長鐃寂寞送浮生
縱筆

惰游不能耕心媿新春白獻傲茅三間主人終勝客
又

朝士腰下黃山僧鼻端白放翁俱笑汝飽飯作閑客
又

溫溫地爐紅皎皎紙窗白忽聞啄木聲疑是敲門客
又

雪晴蓼甲紅兩足韭頭白雖無萬錢具野飯可留客

又

小兒勿大勤使汝髮早白長爲南畝民殊勝東閣客
郊行夜歸書觸目

老翁病起厭端居隨意東西不問途霜野艸枯鷹欲
下江天雲溼雁相呼空垣破竈逃租屋青帽紅燈賣

酒爐未畏還家踏泥潦園丁持炬小兒扶

閉戶

老人閉戶動經月嬾就東家借蹇驢身後有名豈如
酒體中不佳聊讀書秦王開圖見七首漢相猶市載
廚車人間憂怖古如此莫怪荒畦常荷鋤

十一月五日夜半偶作

艸徑江村人迹絕白頭病臥一書生窗間月出見梅
影枕上酒醒聞雁聲寂寞已甘千古笑馳驅猶望兩
河平後生誰記當年事淚濺龍牀請北征

晴和出遊湖山間

日出氣稍和呼船渡煙津微風西南來水面生魚鱗
適此一日佳聊娛百年身捋鬚俯船舷一笑彼何人
閨餘春事早已覺陽和新梅花處處開幽香襲衣巾
久病喜我出問訊傾鄉鄰舟回不須速看涌白玉輪

病思

賣劍還山學老農不堪衰與病交攻將軍閉戶方鋤